

Monday, March 10, 2025

Time - 2:30pm - 2:35pm

AKASHVANI AIZAWL

REGIONAL NEWS BULLETIN

(MIDDAY)



CM : AIRPORT

Chief Minister Pu Lalduhoma'n Lengpui Airport IAF kuta hlan turin Draft Memorandum of Agreement (MoA) chu Working Committee in a buatsaih mek a ti a, peihfel ala nilo tih a sawi.

He thu hi vawiina Assembly thutkhawma Tuirial bialtu MLA Pu K. Laldawngliana zawhna a chhanna ah sawiin Chief Minister chuan Lengpui Airport IAF kuta hlan chungchanga Draft Memorandum of Agreement chu Cabinet ngaihtuah turin thehluh ala ni lo a ti a, IAF hnena Lengpui Airport hlan chungchang zir chiang leh Draft Memorandum of Agreement buatsaih tur hi sawrkar din ani tih sawiin Adviser to CM Pu TBC Lalvenchhunga kaihhruaia din ani tih a sawi.

Chief Minister chuan kumin kum tir lamah Working Committee leh tlawmngai pawl intelkhawm All NGO leh Lengpui khawtlang hruaitute nen hemi chungchang hi sawiho ani tawh tih sawiin amah ngei pawh NGO Coordination Committee te nen an sawiho leh a ti a, 16th Finance Commission hnenah Airport tih changtlunna tur nawr ho ni se tiin thuthlukna an siam tih a sawi bawk.



CM : UCC

Chief Minister Pu Lalduhoma'n Mizoram Sorkarin Uniform Civil Code (UCC) hman tumna a nei loh thu House a hrilh.

He thu hi vawiina Assembly thutkhawmah sawiin Chief Minister chuan UCC chu Mizoram in na takin a dodal thin a ti a, Sawrkar laipuiin barh luih a tum pawhin theihtawpin an tang dawn tih sawiin Article 371G phena him turah an inngai tih sawiin Sawrkar leh Tlawmngai pawl hrang hrang nen tan ho a ngai tih a sawi.

Chief Minister chuan Protected Area Permit chungchang sawiin nikum June leh December inkarah foreigner 2000 dawn anlo lut a ti a, heng lo lut thenkhat hi Chin Hills lamah training an pe nia hriat niin American Ambassador pawh State sawrkar hrilh lovin a rawn lehleng a ti a, tunlai Geo Politics ah ram lian te en mek lai ani tih sawiin Mizoram chu foreigner kalkawng an nimek a ti a, Tourist pangai ni lo tam lutuk chu India sawrkar ngaih a thatloh avangin Sawrkar laipuiin Protected Area Permit chu hman tan turin thu a pe tih a sawi.

Pu Lalduhoma chuan Free Movement Regime chungchang sawiin zalen taka inkalpawh chuan thil tha lo a keng tel thin a ti a, raltlan lokal te chu an enkawl tur ni mahse an awmna hmun a ralmuan hnuaah pawh haw tum tawhlo tam tak an awm a ti a, zalen lutuka inkalpawh chuan sual rawngbawlna tam tak a ken tel avangin Sawrkar laipui hmalakna Free Movement Regime tih tawp pawh a tul rih ah an ngai tih a sawi bawk.



CM SPECIAL PACKAGE

Chief Minister Pu Lalduhoma'n Bana Kaih hnuaia Chief Minister Special Package atan cheng vbch 20 dah ani a ti a, Beneficiary pakhtatah cheng nuai 1 aia tlem lova pek tum ani tih a sawi.

Vawiina Assembly thutkhawma Tuirial bialtu Pu K.Laldawngliana zawhna chhangin, Pu Lalduhoma chuan Chief Minister Special package dil tur te chuan Online application download a, District tina DC hneah thehluh tur a ni a ti a, Dilna thehluh chu Department in enfiahin din chhuahpui tur ngeia an hriatte an thlang dawn tih sawiin tun dinhmunah mi sing 2, sang 9,403-in an dil tawh a, a dawng tur thlan a la ni lo tih House a hrilh a ni.

Chief Minister chuan tun dinhmunah Minister te leh Adviser to Chief Minister ten motor pakhat theuh bakah a spare pakhat theuh an kawl tih a sawi bawk.



LAW & JUDICIAL MINISTER

Law & Judicial Department changtu, Chief Minister Pu Lalduhoma'n tun dinhmunah sorkar hnathawk hlawh ennawn tumna a awm rih lo tih House a hrilh.

He thu hi vawiina Assembly thutkhawma zawhna leh chhanna huna Lunglei West bialtu Pu T. Lalhlimpuia zawhna a chhannaah sawiin, Chief Minister chuan tun dinhmunah sorkar ukil an ni emaw hnathawk dang an ni emaw hlawh ennawn tumna sorkarin a nei rih lo tih House a hrilh a, Lunglei Rahsi Vengah District Court Building sa tha tura hmalak mek a nih thu sawiin, DPR siam zawh a la nih loh avangin, sum sanction zat hriat theih a la ni lo tih sawiin District Court sakna tur ram chu tihfel mek a ni tih a sawi bawk.

